




LECTIO PREADOLEXENTE - ADOLEXENTE SIRA

HASORU MARIA IHA KANA

Iha tempu Jezús nian, maibé agora mós, kazamentu mak akontesimentu importante no boot iha ema nia moris.

Kana mak knua ida ne'ebé ladún boot, besik Nazaret, no iha Evanjellu S. João nian halo ema komprende katak konvidadu sira mak barak. Bainhira hanesan ne'e, labarik no foin-sa'e sira oferese an atu tulun (durante festa boot ida presiza nafatin ema



barak!), maski sira la manán osan, maibé sira bele haksolok ho musika, bele rona notisia ne'ebé konvidadu sira husi oinoin haktuir, no bele han didi'ak bainhira festa hotu ona. Ohin ita koko atu asiste ba kazamentu Kana nian, "husi kotuk", hamutuk ho labarik sira ne'ebé serbí.

Ita hahú hodi lee pasajen ida ne'e hodi halo diálogo: naradór, Maria, Jezús, uma na'in tenda.

Agora, hamutuk ho preadolexente sira ita "hafuhu" buat ne'ebé mosu iha kazamentu ida ne'e. Husi Nazaret mai família ida ne'ebé oin seluk uitoan: iha inan ida, naran Maria, ne'ebé bonita no hakmatek, iha ninia oan mane, naran Jezús, maizumenus tinan 30, ne'ebé lori nia kolega ruma tuir festa. Hodi haree nafatin Evanjellu no hodi hanoin katak oratorianu sei tuir festa tanba tulun iha kuziña no atu serbí, imi koko atu dehan buat ruma kona-ba ema sira ne'e (uitoan presiza fantasia atu hanoin loos Maria no Jezús halo oinsá, maibé Evanjellu bele tulun atu la inventa demais!!)

- 1) Maria: ninia hahalok no ninia estilu hanesan fetu sira seluk ne'ebé haree iha festa? Saida mak imi gosta liu iha nia? Oinsá ninia relasaun ho Jezús? Oinsá Maria ko'alia ba Nia? Oinsá nia ko'alia ba imi? (keta haluha katak imi ba tulun nune'e imi mak hola parte grupu atan sira nian)

- 2) Jezús: ninia hahalok durante festa oinsá? Oinsá nia ko'alia ba ninia inan? Oinsá nia ko'alia ba imi?
- 3) Atan sira: se imi atan karik, imi hatán sa loos no imi sa de'it bainhira Maria uluk no hafoin Jezús ko'alia ba imi?



(reflesaun ida ne'e bele halo preadolexente hotu hamutuk, ka bele faheba grupu sira, maibé di'ak liu katak, maski fahe ba grupu, iha animadór ida hamutuk ho sira atu gia sira-nia reflesaun no resposta)

Festa hotu ona: ema hotu ba uma kontente liu no mós atan sira bele han hemu hakmatek buat ne'ebé resin (no, liuliu tua, iha resin barak!).

Kalan, bainhira imi iha imi-nia uma, no imi hanoin fali ba buat ne'ebé imi haree durante kazamentu ida ne'e, imi hanoin saida kona-ba Maromak, Jezús no Maria?



(preadolexente ida-idak hakerek fraze ida ba Maromak, ida ba Jezús no ida ba Maria)

Maromak _____

Jezús _____

Maria _____

Iha Afrika ema hateten proverbium ida ne'e:

Dader-dader, liaun hader hodi hanoin katak nia tenke hala'i maka'as atu bele hala'i liu no hetan bibi ruma atu han no nia bele moris.

Dader-dader, bibi hader hodi hanoin katak nia tenke hala'i maka'as atu liaun la bele to'o nia, nune'e nia bele moris.

Dader-dader, bainhira ó hader, keta husu ba ó-nia an se ó mak liaun ka bibi, maibé hahú hala'i hodi la lakon esperanza atu hasoru Jezús iha ó-nia dalan.

